

## **ABENDUALDIKO IV. DOMEKEA (B)**

### **SARRERAKO OHARRA**

Egun on, Jaunaren Egunean, Eukaristia ospatzera etorri zareen guztioi.

Abendu aldiko azken domeka honetan, gabonetako atarian aurkitzen gara. Itxaropenaren Ama Birjinea dan Mariagan jarriko doguz begiak. Berak erakutsiko deusku Jaungoikoari ADI egoten eta Haren nahia egiten. Mariaren “baietzari” esker, Jainkoak bere bizilekua jarri eban gure artean. Jarri gaitezana gu salbatzera datorren UMEAREN ZAIN.

Gabon aldia egokia da senidetasuna, solidaritatea eta harrera bultzatzeko. Hauexek dira, Ebanjelioak aurkezten deuskuzan balioak Mundu Barria, azkenak lehenengoak izango diran mundu hobe egiteko.

Jesus umearen zain, Andra Mariarekin bat egin dagigun.

### **ABESTIA:**

Aingeru batek Mariari, dinotso: “Graziz betea  
Jaungoikoaren Semeari, emon deusazu sortzea.

Goiz arrats eta eguerditan, Ama goresten zaitugu  
aingeruaren hitzak eurak, guk ere esaten ditugu.

### **ABADEAREN AGURRA**

Gu salbatzera datorren jauna izan bedi zuekin.

### **OTOITZA, KOROAREN LAUGARREN KANDELEA BIZTEN DANERAKO**

Prestatu dagigun gure bihotza Gabonetarako, Abenduko koroaren laugarren kandlea biztuz.

Laugarren kandlea bizten dan bitartean (gainerako hirurak aurretik biztuta egongo dira),

Jauna, Laugarren kandlea iziotzerakoan, Maria, zure Ama, dogu gogoan.

Inork ez zinduzan itxaron gogotsuago eta maitasun

haundiagoz.

Geuk ere holantxe gertatu gura dogu geure barrua:  
fedez, maitasunez eta eguneroko lanez.

Zatoz bizkor, Jauna, zatoz gu salbatzera!

## **HITZAREN LITURGIA**

### **2 Sm 7, 1-5. 8b-11. 14a. 16:**

Dabidek etxe bat eregi nahi deutso Jaungoikoari.  
Jaungoikoa bere alde euki nahi dau. Baina Jaungoikoak  
jauretxe biziak gura ditu. Gizadia da Biziaren Jainkoaren  
jauretxea.

### **Erantzun-Salmoa: 88. Salmoa**

Jainkoak, gizon-emakumeei dautsen maitasuna,  
abestuko dogu salmo honetan. Jesus da Aitaren  
maitasunaren ezaugarria.

"Jauna, zure maitasuna abestuko dot..."

Jauna, zure maitasun-egintzak kantatuko ditut beti,  
zure leialtasuna iragarriko gizaldiz gizaldi.

Bai, autortzen dot:

«Betiko eraikia dago zeruan zure maitasuna,  
sendo ezarria zure leialtasuna». R/.

Ituna egin dot neure aukeratuagaz,

David neure morroiari zin eginez:

«Sendo ezarriko dot betiko zure errege-jatorria,  
Gizaldiz gizaldi eraikiko zure errege-aulkia». R/.

Harek dei egingo deust: «Zu nire aita,  
nire Jainkoa, nire hatx salbatzailea».

Beti gordeko deusat neure maitasuna,  
sendo eutsiko haregaz dodan itunari. R/.

### **Erm 16, 25-27:**

San Paulok gogoratuko deusku Jaungoikoaren ezkutuko  
misterioa Jesusegan agertu jakula.

Lk 1, 26-38:

Mariagan ipiniko dau Jaungoikoak gizakien artean eregiko dauan benetako jauretxearen lehenengo harria. Zerua lurrera hurreratuko da. "Aleluia" abestuz, gertatu gaitezkan Jaunaren Barri Ona entzuteko.

**ABENDUALDIRAKO** Aleluia: Urratu eizue (G.J. 8/41)

A - le - lu - - ia! A - le - lu - - ia! A - le - lu - ia!

V/. Ur - ra - tu ei - zu - e bi - de - a Jau - na - ren - tzat, zu - zen - du ha - ren bi - dex -

kak: e - ta i - ku - si - ko da - be guz - ti - ek Jaun - goi - ko - a - ren sal - ba - me - na.

## Homili amaieran EZAUGARRIA

(Komeni da monizinoan asteroko ezaugarria aipatzea eta jarri ezaugarria altara aurrean)

**Monizinoa:** Gaur, beste pausu bat Jaunaren jaiotza prestatzen. Sehaskan, almohadea jarriko dogu.

(Sehaskan almohadea eta inguruan "UMEAREN ZAIN" kartela)

## UMEAREN ZAIN

Azken orduak Amabirjinagaz pasatu daiguzan. Zer ete da, ama baten zain egotea hain garrantzitsua dan une honetan.? Egin daigun isilunetxo bat.

Zer itxaroten ete dau Jesusek gaurko egunez nire aldetik? Geratzen jakuzan orduetan hartu daigun unetxo bat SALBATZERA DATORREN UMEAGAZ BERBA EGITEKO.

Jainko Aita ona, Mariaren baietza guretzat salbamen bidea da. "Hona hemen Jaunaren mirabea; jazo bekit zuk dinozun lez". JESUS UMEAREN ZAIN egoteak, gure bizitzak esker onez bete daizala eta egunero bere nahia egitera bultzatu. Zatoz, Jesus Jauna, zatoz guztiok salbatzera!

## JAINKO HERRIAREN OTOITZA

Bat egin dagigun otoitzean, Jaungoikoaren Semeak gizateria osoaren bidea barriztatu dagian. Oihukatu dagigun ZATOZ, JESUS, JAUNA!

—Elizearen alde. Maria bere itzalaz babestu eban Espiritu Santuak, zuhur mantendu dagiala eta Jesusen bidetik kristau alkarte bideratu dagiala. Egin dagigun otoitz

—Gerrea, gogorkeria, gorrotoa eta injustizia sufritzen dagozan herrien alde, era apartekoz gogoan ditugu: Ukraina, Palestina, Israel; gizakiari pakea ekartzera datorren salbatzaileak, euren bihotzean sortu dagien pakea bilatzeko bide egokien beharizana. Egin dagigun otoitz

—Behartsuen alde, egoitzetan, etxeetan gaixorik, bakardadean, baztertuta sentitzen diranek eta, orokorrean norbaiten bisita itxaroten dabenean, euren ondoan dagoen pertsonak geroago ta gehiago egon daitezana. Egin dagigun otoitz

—Gu guztion alde. Jaunak eskuzabaltasunez eta maitasunez bete gaizala, eta behartsuenen artean haragitu gaitezana, horrela, egun guztiak Gabon bihurtu dagiguzan. Egin dagigun otoitz

Zatoz, Jauna, eta emon zure kontsolamendua nahigabetuei, zure indarra jarraitu gura deusugunoi, zure argia ezagutzen ez zaituenei eta bihotz barria euren egoismoan itxita bizi diranei. Errege bizi zara-ta gizaldi eta gizaldi guztietan.

## JAUNARTZEAN

**Zatoz, Jauna, zatoz lurrera** zure herri hau salbatzera.

<sup>1</sup> *Bakea ta justizia bialdu mundura, Jauna; zure jaiotzak gugana bekar poza, zoriona.*

<sup>2</sup> *Okerretatik zuzendu, gaitz bideetatik aldendu, gure kateak apurtu, bide ilunak argitu.*

<sup>3</sup> *Gorroto-bideetatik aldendu gagizuz, Jauna; alkar parkatu dagigun emoiguzu maitasuna.*

## **AZKEN AGURRA**

Mariagaz bat eginda, amaitu daigun Gabonetarako prestakizuna. Jaunaren mirabeak lagundu deiskula behartsuenen zerbitzuan bizi izaten, eta Jaungoikoaren Berbea onartzen.

**Alaitasuna lurrean:** badator egunsentia.

Alaitasuna lurrean: gu salbatzera dator Jainkoa.

Jainko zuzen, zintzo, gutaz, arren, erruki;

agindu zendun Salbatzailea zure seme-alabori, arren, bidali.